

आकाशवाणी जयपुर-अजमेर  
प्रादेशिक समाचार

दिनांक 12.12.2024

समय: 18.45 बजे

- मुख्यमंत्री भजनलाल शर्मा राज्य री मौजूदा सरकार री पहली वर्षगांठ रा सिलसिला मांय 15 हजार ऊं बत्ता नौजवानां ने नौकरी लागण रा कागजात सूप्या-कह्यो- सरकार नौजवानां रा सपना सांचा करणो तैय कीनो।
- राज्य सरकार न्यारा-न्यारा महकमां मांय 85 हजार बत्ता ओहदां माथे भर्ती री प्रक्रिया सरू कीनी।
- केन्द्र सरकार देशभर मांय सड़क हादसां मांय जख्मी लोगां रा कैशलेस ईलाज री योजना बेगी ई लागू करेला।
- प्रदेश मांय सर्दी रो असर और बध्यो- फतेहपुर मांय आज ई पारो शून्य ऊं नीचे दर्ज करी ज्यो।

000

मुख्यमंत्री भजनलाल शर्मा कह्यो है के राज्य सरकार नौजवानां रा सपना पूरा करण सारू मन ऊं काम कर रही है। वे आज जोधपुर मांय राज्य री मौजूदा सरकार रा कामकाज रो एक साल पूरो व्हेवण रा सिलसिला मांय राख्यी ज्या राज्य स्तर रा कार्यक्रम मांय बोल रह्या हा। कार्यक्रम मांय श्री शर्मा 15 हजार ऊं बत्ता जणा ने सरकारी नौकरी रा कागज, होशियार टाबरियां ने स्कूटी, दिव्यांगजन ने ट्राइसाइकिल अर ऊपतू अंग अर उपकरण अर आयुष्मान कार्ड दीना। ई मौके मुख्यमंत्री कह्यो के लारली सरकार भ्रष्टाचार दीनो, जदके वां रा राज मांय नौजवानां रा सपना सांचा कर्या जा रह्या है।

.....

मुख्यमंत्री कह्यो के राज्य सरकार पेपरलीक माफिया रे खिलाफ करड़ी कार्रवाई करणो तैय कीनो है। वे कह्यो के राइजिंगे राजस्थान ग्लोबल इन्वेस्टमेंट समिट रा तैत करी ज्या न्यारा-न्यारा करार ऊं प्रदेश मांय नौजवानां सारू नौकरी धंधा रा और मौका मिलेला। कार्यक्रम मांय मुख्यमंत्री वीडियो कॉन्फ्रेंसिंग रे मार्फत जैसलमेर, चूरू अर दौसा ऊं नर्सिंग ऑफिसर अर संगणक ओहदां माथे नुवी नौकरी लाग्या नौजवानां सागे बात कर र वां ने बधाई दीनी। कार्यक्रम मांय चिकित्सा मंत्री गजेन्द्र सिंह खीवसर कह्यो के राज्य सरकार री मां योजना मांय 18 सौ पैकेज व्हेला, जिण रा तैत प्रदेश रा लोग दूजा राज्यां मांय ई ईलाज करा सकेला। प्रदेश रा न्यारा-न्यारा जिलां मांय ई रोजगार उत्सव राख्यी ज्या, ज्यां मांय प्रभारी मंत्री अर आला अहलकार नौजवानां ने नियुक्ति पत्र सूप्या। जयपुर मांय प्रभारी मंत्री जोगाराम पटेल जिला स्तर री प्रदर्शनी रो उद्घाटन कीनो। ई पाछे खबरनवीयां सागे बातचीत करता थकां पटेल कह्यो के राज्य सरकार नौजवानां रा सपना सांचा करण माथे खास ध्यान दे रही है। वे कह्यो है के सरकार मोटी तादाद मांय सरकारी नौकरियां सारू भर्ती निकाळी है अर गैर सरकारी हलका मांय नौकरी-धंधा रा मौका मुहैया करावण सारू उद्योगां ने बधावो देवण सारू लगातार कोशिशों करी जा रही है। जैसलमेर मांय राख्यी ज्या कार्यक्रम मांय गौपालन मंत्री जोराराम कुमावत कह्यो के प्रधानमंत्री नरेन्द्र मोदी रा संकल्प ने मजबूत करण सारू राज्य सरकार लगातार काम कर रही है।

.....

इण ऊं पैली प्रदेश रा सगळा जिलां मांय **रन फॉर विकसित राजस्थान** राख्यी ज्यी। जयपुर मांय मुख्यमंत्री भजन लाल शर्मा अमर जवान ज्योति ऊं 'रन फॉर विकसित राजस्थान' ने हरी झंडी बता र रवाना कीनी। ई सागे ई जिलां मांय सूचना अर जनसम्पर्क विभाग री ओर ऊं विकास प्रदर्शनियां लगाई ज्यी। सलूम्बर मांय आज **हर घर खुशहाली** कार्यक्रम सरू व्ह्यो। भरतपुर मांय न्यारा-न्यारा सरकारी महकमां री ओर ऊं पंच गौरव रा तैत बेहतरीन काम करण वाळां रो मान करी ज्यो। भजन लाल सरकार री पहली वर्षगांठ रा

कार्यक्रमां री कड़ी मांय काल किसान सम्मेलन राख्या जावेला। 14 दिसम्बर ने महिला सम्मेलन अर 15 दिसम्बर ने सेवा शिविर अर खूनदान शिविर लगावण समेत न्यारा-न्यारा कार्यक्रम व्हेला।

000

राज्य सरकार न्यारा-न्यारा महकमां मांय 85 हजार ऊं बत्ता ओहदां माथे भर्ती री प्रक्रिया सरू कीनी है। आज राजस्थान लोक सेवा आयोग, राजस्थान कर्मचारी चयन बोर्ड, अधीनस्थ सेवा बोर्ड अर दूजी भर्ती एजेन्सियां री ओर ऊं मोटी तादाद मांय भर्ती सारू अधिसूचनावां जारी करी ज्यी। चतुर्थ श्रेणी कर्मचारी भर्ती रा 52 हजार 453 ओहदां सारू ऑनलाइन अर्जियां 21 मार्च ऊं 19 अप्रैल 2025 तांई दी जा सकेला। ई सागे ई प्रहरी रा 803, सीनियर टीचर रा 2 हजार 129, चिकित्सा शिक्षा विभाग मांय अस्सिस्टेंट प्रोफेसर रा 329 अर वरिष्ठ वैज्ञानिक अधिकारी रा 14 ओहदां माथे भर्ती व्हेला। ऊर्जा विभाग मांय 487 अर आरसीडीएफ रा 505 ओहदां माथे भर्ती री प्रक्रिया आवता महीना सरू व्हेला।

000

शाही रेलगाड़ी पैलेस ऑन व्हील्स आज जयपुर रा गांधीनगर टेसन पूगी। इण मांय 5 देशां रा 30 सैलाणी सवार है, ज्यां मांय अमेरिका रा 20, कनाडा रा 4 अर भारत, दक्षिण अफ्रीका अर ब्रिटेन रा 2-2 सैलाणी शामिल है। आं सैलाणियां ने जयपुर री सैर-सपाटा री खास-खास ठोडां घुमाया जा रह्या है। आ गाड़ी सारू खास तौर ऊं सैलाणियां ने राजस्थान री शाही विरासत अर संस्कृति महसूस करावण सारू तैयार करी ज्यी है।

000

देश मांय हादसां रा शिकार लोगां सारू बेगी ई कैशलेस ईलाज री योजना सरू करी जावेला। केंद्रीय सड़क परिवहन अर राजमार्ग मंत्री नितिन गडकरी आज लोकसभा मांय एक सवाल रा लिखित जवाब मांय आ जाणकारी दीनी। श्री गडकरी कह्यो के छह राज्यां मांय चाल रही आ योजना बेगी ई उत्तर प्रदेश मांय अर वां पाछे देश रा बाकी हलका मांय सरू करी जावेला।

.....

हाई-वे माथे हादसां री बधती तादाद मांय चिंता जताता थकां गडकरी सांसदां ऊं सड़क हादसां रा कारण री ठा करण सारू हर जिला मांय दुर्घटना निवारण समितियां बणावण री अरज कीनी। वे बतायो के सड़क हादसां रा शिकार 30 फीसदी लोगां री सरूआती ईलाज मांय देरी रे कारण मौत व्हे जावे है। श्री गडकरी बतायो के फिलहाल छह राज्यां मांय चाल रही कैशलेस उपचार योजना ऊं 21 सौ जणा री जान बचाई ज्यी है।

000

मुख्यमंत्री भजनलाल शर्मा रा काफिला सागे काल जयपुर रा जगतपुरा हलका मांय व्ह्या हादसा रे कारण जख्मी टैक्सी ड्राइवर री ई ईलाज रे दौरान आज मौत व्हे गयी। एक टैक्सी रे गलत दिशा ऊं आ र मुख्यमंत्री रा काफिला री एक गाड़ी ने टक्कर मार देवण रे कारण व्ह्या ई हादसा मांय काल जयपुर पुलिस रा एसआई सुरेंद्र सिंह री ई मौत व्हे गयी ही। राज्यपाल हरिभाऊ बागडे ए.एस.आई सुरेंद्र सिंह रे देवलोक व्हेवण परां गहरो शोक जतायो है। ई बीचे हादसा रे कारण जख्मी चार पुलिस वाळां रो ईलाज चाल रह्यो है। मामला री जांच जयपुर पूर्व री डीसीपी तेजस्विनी गौतम ने सूंपी ज्यी है। पुलिस महानिदेशक उत्कल रंजन साहू हादसा माथे गहरो दुःख जताता थकां मरण वाळां री आत्मा री शांति री प्रार्थना कीनी है।

000

उपराष्ट्रपति जगदीप धनखड़ रा पैतृक गांव झुंझुनू ज़िला रा किठाना ने साफ़-सफ़ाई रा हलका मांय रोल मॉडल बणायो जावेला। ई सारु स्वच्छ भारत मिशन ग्रामीण रा प्रदेश समन्वयक के.के. गुप्ता गांव रो दौरा कीनो अर इण री कार्ययोजना बणावण बाबत् गांव वाळां सागे चर्चा कीनी। श्री गुप्ता गांव मांय गोबर रा सही तरीका ऊं निपटारा सारु सरकारी सब्सिडी री मदद ऊं हर घर मांय गोबर गैस प्लांट लगावण री अरज कीनी।

000

राज्य मांय ज़ोरदार ठण्ड पड़बा लागी है। प्रदेश मांय न्यूनतम तापमान औसतन 11 डिग्री सेल्सियस ऊं नीचे उतर ग्यो है। सीकर ज़िला रा फतेहपुर मांय पारो आज ई शून्य ऊं नीचे दर्ज करी ज्यो, जदके सीकर शहर मांय ई तापमान उतर र एक डिग्री सेल्सियस नापी ज्यो। करौली मांय न्यूनतम तापमान 2 दशमलव 2 डिग्री सेल्सियस रिकॉर्ड करी ज्यो। म्हाणा खबरनवीस बतायो के हाड़ कंपाती ठंड ऊं बचण सारु लोग भांत-भांत रा जतन कर रह्या है।

.....

राजधानी जयपुर मांय ई पारो उतर र 6 दशमलव 8 डिग्री सेल्सियस दर्ज करी ज्यो। सवाईमाधोपुर अर झुंझुनू मांय ई खुला हलकां मांय बर्फ जमी निजर आयी। हनुमानगढ, श्रीगंगानगर अर पाली समेत केई ठोड़ां सीळो बायरो बाजण ऊं टिटुरन बध गयी है। मौसम केन्द्र जयपुर आवता 3-4 दिन केई ठोड़ां शीतलहर रा हालात रेहवण रा आसार जताया है।

000

गणतंत्र दिवस रा सिलसिला मांय रक्षा मंत्रालय री ओर ऊं माई जी ओ वी प्लेटफॉर्म माथे 10 ऊं 13 दिसंबर बीचे भारत री सांस्कृतिक विरासत अर परंपरावां रा बारा मांय ऑनलाइन होड़ राख्यी जा रही है। होड़ मांय सैनिक अर दूजी स्कूलां रा विद्यार्थी, एन.सी.सी. कैडेट, एन.एस.एस. रा खुद सेवक अर आम जनता सिरकत कर सके है।

000